



Zeleni klub grupe poslanika/zastupnika Parlamentarne skupštine Bosne i Hercegovine, Parlamenta Federacije Bosne i Hercegovine, Narodne skupštine Republike Srpske i lokalnih skupština/vijeća, dana 25. 03. 2019. godine u Sarajevu organizovao je konferenciju **„Problem skladišta/odlagališta radioaktivnog i nuklearnog otpada na lokaciji Trgovske gore“**, (u daljnjem tekstu: Konferencija), te su učesnici Konferencije, uzimajući u obzir sve dosadašnje postupke i radnje koje su nadležne institucije i organi Republike Hrvatske izvršili, kao i strategije, planove i programe koje su usvojili radi uspostave/izgradnje skladišta/odlagališta radioaktivnog i nuklearnog otpada na lokaciji Trgovske gore, u neposrednoj blizini granice sa Bosnom i Hercegovinom, usvojili sljedeće

ZAKLJUČKE I INICIJATIVE

1. Lokacija Trgovska gora, mikrolokacija Čerkezovac, općina Dvor, Republika Hrvatska koja je Nacionalnim programom za provedbu Strategije zbrinjavanja radioaktivnog otpada, iskorištenih izvora i istrošenog nuklearnog goriva (Program za razdoblje do 2025. godine s pogledom do 2060. godine) određena kao lokacija za zbrinjavanje institucionalnog radioaktivnog otpada i iskorištenih izvora, kao i za dugoročno skladištenje nisko i srednje radioaktivnog otpada iz Nuklearne elektrane Krško, nije prihvatljiva jer se nalazi na granici, uklinjena u teritorij Bosne i Hercegovine, te ista ne ispunjava eliminatorne kriterije za odlagalište nisko i srednje radioaktivnog otpada. Zbog blizine granice sa Bosnom i Hercegovinom i njenog geografskog položaja predmetna lokacija imat će najveći negativni utjecaj na stanovništvo i životnu sredinu u Bosni i Hercegovini, na raznovrsni biljni i životinjski svijet, na rijeku Unu i vodozahvate vode za piće, ugroziti će Park prirode „Una“, Nacionalni park „Una“ i onemogućiti turizam i proizvodnju zdrave hrane u cijelom pogođenom području.
2. Dosadašnji postupci koji su vođeni od strane institucija i organa Republike Hrvatske, a koji se odnose na odabir lokacije na Trgovskoj gori za zbrinjavanje radioaktivnog otpada, iskorištenih izvora i istrošenog nuklearnog goriva, nisu u skladu sa međunarodnim konvencijama, direktivama, sporazumima i standardima koji su pravno obavezujući za Republiku Hrvatsku.
3. Pozdravljamo i izražavamo podršku zaključcima koje je Predsjedništvo Bosne i Hercegovine usvojilo na sjednici održanoj 22. marta 2019. godine kojima se, između ostalog, traži od Republike Hrvatske da lokaciju Trgovska gora, koja se nalazi u neposrednoj blizini granice sa Bosnom i Hercegovinom, izuzme kao mjesto predviđeno za odlaganje i skladištenje radioaktivnog i nuklearnog otpada.
4. Pozivamo sve nadležne institucije i organe u Bosni i Hercegovini na intenzivniji institucionalni i sveobuhvatni pristup radi osporavanja i sprečavanja uspostavljanja

skladišta/odlagališta radioaktivnog i nuklearnog otpada na lokaciji Trgovske gore korištenjem pravnog osnova iz Konvencije o nuklearnoj sigurnosti (Beč, 17. jun 1994. godine), Zajedničke konvencije o sigurnosti zbrinjavanja istrošenog goriva i zbrinjavanja radioaktivnog otpada (Beč, 5. septembar 1997. godine), Konvencije o procjeni utjecaja na okoliš preko državnih granica (Espoo, februar 1991. godine) sa Protokolom o strateškoj procjeni okoliša (Kijev 21. maj 2003. godine), Arhuske konvencije od 25. juna 1998. godine o pristupu informacijama, učešću javnosti u odlučivanju i pristup pravdi u okolišnim pitanjima i EURATOM direktiva.

5. Predlaže se Parlamentarnoj skupštini i Vijeću ministara Bosne i Hercegovine da se hitno izvrši izmjena i dopuna Odluke o formiranju Radne grupe za praćenje stanja i aktivnosti u vezi sa mogućom izgradnjom skladišta/odlagališta radioaktivnog otpada na lokaciji Trgovske gore, Općina Dvor, Republika Hrvatska, radi izmjene članova poselnika/zastupnika i delegata kojima je istekao mandat, te da se poboljša operativnost i efikasnost ovog radnog tijela.
6. Uvažavajući dosadašnji aktivizam i pravovremene reakcije pozivamo sve lokalne zajednice, gradove i općine u Republici Hrvatskoj i Bosni i Hercegovini koje su posredno i neposredno zahvaćene i pogođene mogućim negativnim utjecajem skladišta/odlagališta radioaktivnog i nuklearnog otpada na lokaciji Trgovske gore da i dalje prate, planiraju i organiziraju događaje koji imaju za cilj razvijanje svijesti o zaštiti zdravlja, životne sredine i okolinske sigurnosti, kao i protivljenje/sprečavanje uspostave predmetnog radioaktivnog i nuklearnog skladišta/odlagališta.
7. Predlaže se nadležnim institucijama utvrđivanje mogućnosti sudske zaštite ljudskih prava građana sa obje strane rijeke Une, a zbog kršenja osnovnih ljudskih prava. Pozivamo nadležene institucije da pristupe formiranju pravnog i ekspertnog tima.